



Broj: 01/1-02-2913/18
Breza, 28.11.2018. godine

Z A P I S N I K

Sa DVADESETTREĆE REDOVNE SJEDNICE Općinskog vijeća održane dana 31.10.2018. godine sa početkom u 16,30 sati u prostorijama Općine Breza-Sala Općinskog vijeća.

Sjednicom je predsjedavao predsjedavajući Općinskog vijeća Jusić Vedad.

Po izvršenoj prozivci konstatovano je da sjednici Općinskog vijeća prisustvuje 19 vijećnika.

Opravdano odsutan vijećnik Zaimović Anes a vijećnik Salčinović Fikret najavio kašnjenje.

Osim vijećnika sjednici Općinskog vijeća su prisustvovali: Općinski načelnik Munib Zaimović, pomoćnici Općinskog načelnika: Smajila Omerhodžić, Meliha Beširević, Salih Hasanspahić, Herco Huso, savjetnik Općinskog načelnika Mirza Džambić, predstavnici firme „Routing“ Banja Luka, učenici Opće Gimnazije „Muhsin Rizvić“ Breza, predsjednik Etičkog odbora te predstavnici medija.

Predsjedavajući Općinskog vijeća upoznao je vijećnike da je održan sastanak komisije za Statut i propise te da je mišljenje komisije dostavljeno vijećnicima. Isto tako vijećnicima je naknadno dostavljen i prijedlog Programa rada Skupštine ZDK za 2019. godinu te da vijećnici do 05.12.2018. godine mogu dostaviti svoje prijedloge, sugestije i mišljenja.

Na početku sjednice se prešlo na razmatranje Zapisnika sa 22. redovne sjednice Općinskog vijeća Breza.

Primjedbu na Zapisnik dao je vijećnik Sirotanović Arif koji je istakao da u zapisniku nisu tačno navedeni navodi vijećničkog pitanja koje je on postavio Općinskoj izbornoj komisiji te traži da se to ispravi.

Nakon toga pristupilo se glasanju gdje je konstatovano da je Zapisnik sa 22. redovne sjednice usvojen sa 18 glasova ZA i jednim SUZDRŽANIM glasom.

Zatim se prešlo na odgovore na vijećnička pitanja.

Vijećnik Bajrić Fetah prokomentarisao je odgovor Sindikalne organizacije Breza i istakao je „Kako se Sindikat odnosi prema Vijeću tako će se i Vijeće odnositi prema Sindikatu“, te odnos Sindikata prema prijemu novih službenika i rješavanje viška zaposlenih, te je za očekivati da dođe do otpuštanja uposlenika sa dužim radnim stažom, da bi novo uposleni službenici ostali u organu uprave.

Vijećnik Bašić Mirnes istakao je da nije zadovoljan odgovorom na vijećničko pitanje koje se odnosi na istresanje komunalnog otpada na lokaciji površinskog kopa Gornja Breza i istakao je da se radi o klasičnom otpadu a ne o „šutu“ kako je navedeno u odgovoru Komunalnog preduzeća te da će podnijeti prijavu protiv istog.

Vijećnik Sirotanović Arif istakao je da nije dobio odgovor na vijećničko pitanje koji se odnosi na provođenje izbornog procesa.

Predsjednik Općinske komisije Zahirović Safet pojasnio je da je 24.10.2018. godine odgovorio na vijećnička pitanja koja je postavio vijećnik Sirotanović Arif te da se odgovori nalaze u materijalima za sjednicu Općinskog vijeća.

Vijećnik Avdić Edin nadovezao se na diskusiju vijećnika Bašić Mirnesa a koja se odnosi na istresanje komunalnog otpada na lokaciji površinskog kopa Gornja Breza te da mu nije jasan odgovor direktora Komunalnog preduzeća koji je rekao „JP Komunalno doo Breza želi da pomogne lokalnoj zajednici u rješavanju pitanja odvoza i upravljanja otpadom a izgradnjom centra za upravljanja otpadom to je najbolje rješenje“ i traži pojašnjenje šta znači „Izgradnja centra za upravljanje otpadom“

Zatim se prešlo na postavljanje novih vijećničkih pitanja.

Vijećnik Mirza Ahmedspahić postavio je vijećničko pitanje koje se odnosi na status prilaznog puta prema novoizgrađenom objektu Robot.

Vijećnik Bašić Mirnes pokrenuo je inicijativu da se lokalni put Orahovo-Mahmutović Rijeka osposobi za prijevoz obzirom da u ovom naselju žive mahom starije osobe kojima je neophodna ljekarska pomoć te da mogu doći do najbliže zdravstvene ustanove.

Druga inicijativa koju je pokrenuo vijećnik Bašić odnosi se da radnici PS Breza obilaze glavnu autobusku stanicu obzirom da je primjećeno da tu dolazi do skupljanja lica koja konzumiraju alkohol te je u pitanju sigurnost putnika.

Vijećnik Sirotanović Arif ponovo je uputio vijećničko pitanje koje se odnosi na ažuriranje biračkog spiska te korespondenciji između matičnog ureda Breza i PS Breza sa Općinskom izbornom komisijom.

Drugo vijećničko pitanje Sirotanović Arifa odnosi se na to da li je Općinsko vijeće glasalo za dodjelu sredstava za odbranu lica protiv kojih je potvrđena optužnica za ratne zločine.

Vijećnik Muratović Asim postavio je pitanje „Zašto se nadležne službe nisu očitovale na zahtjeve i dopise mještana naselja Vrbovik, odnosno članova Savjeta mjesne zajednice Župča podružnica Vrbovik, po nekoliko pitanja koja su upućena nadležnim strukturama Općine Breza“.

Drugo vijećničko pitanje Muratović Asima odnosi se na obilježavanje ulica i brojeva na objektima u naselju Župča prema usvojenoj Odluci o određivanju naseljenih mjesta u kojima je obavezno određivanje imena, ulica na području Općine Breza.

Vijećnica Jekalović Amina uputila je pitanje PS Breza u ime Općinskog odbora OO SDP Breza da li postoji mogućnost da se do naredne sjednice Općinskog vijeća dostavi informacija koliko je u proteklih 6 mjeseci napisano prekršajnih naloga i po kom osnovu.

Vijećnik Jusić Vedad postavio je vijećničko pitanje koje se odnosi na problematiku vodovoda Koritnik. Drugo vijećničko pitanje Jusić Vedada se odnosi na broj stambenih jedinica u vlasništvu Općine Breza te ko ih koristi i pod kojim uslovima se iste dodjeljuju.

Vijećnik Bajrić Fetah je naknadno dostavio u pismenoj formi dva vijećnička pitanja a pokrenuo je i inicijativu.

-Prvo pitanje se odnosi: „U kakvom je stanju primljen vodovod Trtorići i koji su se radovi morali uraditi da bi se isti stavio u funkciju. Koje su aktivnosti urađene na vodovodima Slivno i Bukovik II faza te koje firme izvode radove, do kada su rokovi za završetak ovih faza“.

-Drugo pitanje se odnosi na to „Koliko je krivičnih prijava podignuto u vrijeme mandata aktuelnog načelnika, u kojoj su fazi protiv koga i po kom osnovu“

Pokrenuo je i vijećničku inicijativu koja se odnosi na izgradnju trotoara uz regionalni put od mosta Bate do Vrankamena i od Podžupče do Binga.

(U radu vijeća priključio se vijećnik Salčinović Fikret u 17:10h)

Vijećnik Sirotanović Arif predlaže da Općinsko vijeće oda počast poginulim pripadnicima Policijske stanice Sarajevo koji su poginuli prilikom vršenja službene dužnosti te da daju podršku porodicama poginulih.

Nakon postavljanja vijećničkih pitanja prešlo se na utvrđivanje dnevnog reda.

Predsjedavajući Općinskog vijeća predložio je dnevni red kao u Sazivu.

Primjedbi na predloženi dnevni red više nije bilo te je nakog glasanja sa 20 glasova ZA usvojen sljedeći:

D N E V N I R E D

- 1) Razmatranje i usvajanje prijedloga Odluke o usvajanju Regulacionog plana „Uže urbano područje grada Breza“.
- 2) Razmatranje i usvajanje prijedloga Odluke o provođenju Regulacionog plana „Uže urbano područje grada Breza“.
- 3) Razmatranje i usvajanje prijedloga Odluke o pristupanju izradi Zoning plana „Poslovna zona Šaš“.
- 4) Razmatranje i usvajanje Rješenja o utvrđivanju prava vlasništva na gradskom građevinskom zemljištu u korist Duranović Fuad.
- 5) Razmatranje i usvajanje Rješenja o utvrđivanju prava vlasništva na gradskom građevinskom zemljištu u korist Kruezi Jasmin.
- 6) Razmatranje i usvajanje Rješenja o utvrđivanju prava vlasništva na gradskom građevinskom zemljištu u korist Omerhodžić Almedin.
- 7) Razmatranje informacije o provedenim aktivnosti u vezi sa rješavanjem aktuelne problematike FK Rudar Breza i pregled planiranih aktivnosti s ciljem konačnog rješavanja problema FK Rudar Breza u 2018/2019 godini.
- 8) Razmatranje informacije o gospodarenju u šumi i šumskom zemljištu na području Općine Breza u PJ Šumarija Vareš za 2017. godinu.
- 9) Razmatranje informacije o stanju poljoprivrede na području Općine Breza i Izveštaj o realizaciji Programa poticajnih mjera za 2018. godinu
- 10) Razmatranje informacije o provođenju zdravstvene zaštite stanovništva na području Općine Breza u 2018 godini.

Ad.1

Razmatranje i usvajanje prijedloga Odluke o usvajanju Regulacionog plana „Uže urbano područje grada Breza“.

Predstavnicu firme „Routing“ Banja Luka Mirijana Jakovljević detaljno je vijećnike upoznala da je u skladu sa Odlukom Općinskog vijeća izrađena dokumentacija Regulacionog plana Uže urbano područje grada Breza, te u formi Nacrta usvojena na Općinskom vijeću i stavljena na javni uvid i javnu raspravu.

Nakon javne rasprave razmotreni su svi prikupljeni prijedlozi i primjedbe, neke prihvaćene djelimično, neke u cjelosti, a neke i odbačene što je detaljno obrazloženo.

U skladu sa zakonom je pribavljena saglasnost kantonalnog Ministarstva za prostorno uređenje, promet i komunikacije i zaštitu okoline, izdata pod brojem: 12/09-11254-7/18 od 02.10.2018. godine, čime je dokumentacija kompletirana, te dostavljamo prijedlog plana na usvajanje.

Vijećnica Jekalović Amina postavila je pitanje u koliko mjeri je riješen problem parkiranja vozila kod zgrada kolektivnog stanovanja te koliko je riješen problem nedostatka zelenih površina i da li je planiran gradski park i gdje. Također je pitala da li postoje smjernice za očuvanje „Bazilike“.

Predstavnicu firme istakla je da je pitanje parking prostora riješeno gdje god je to bilo moguće te da će se dokumentacijom nižeg reda pobliže regulisati ove površine. Istakla je i

problem rješavanja parking prostora kod Doma zdravlja Breza gdje je predviđena izgradnja garaža.

Pomoćnik Općinskog načelnika Smajila Omerhodžić pojasnila je da u okviru kompleksa „Bazilike“ predviđen centralni dječiji park sa svim sadržajima te da je „Bazilika“ strogo stavljena pod zaštitu države.

Vijećnik Bajrić Fetah uložio je kritiku na dostavljene materijale kao i grafike koje prikazuju Regulacioni plan u malom omjeru te da se na istim ne može proučiti prijedlog plana. Također je zatražio pojašnjenje o načinu određivanja granične linije uz regionalni put od strane predstavnika.

Gospođa Mirijana Jakovljević pojasnila je da se građevinska linija kreće od 3-5 metara zavisno od mogućnosti i položaja postojećih objekata u prostoru. Kada je u pitanju dostavljeni materijal isti je službi dostavljen u odgovarajućoj razmjeri ali vjerovatno prilikom slanja istih je smanjen.

Vijećnik Avdić Edin slaže se da grafički dio nije uočljiv i da se na istom ništa ne vidi. Pitao je koji su objekti predviđeni za rušenje. Istakao je da je od ponuđenih prijedloga i sugestija usvojeno ono što je bilo bitno a ono što nije bilo bitno nije ni prošlo.

Gospođa Mirijana Jakovljević je pojasnila da se u prostoru koji obuhvata Regulacioni plan uglavnom ruše pomoćni i privremeni objekti kao i privremene garaže.

Pomoćnik Općinskog načelnika Smajila Omerhodžić istakla je da je predložena Odluka o usvajanju Regulacionog plana „Uže urbano područje grada Breza“ u skladu sa Zakonom i planskim dokumentima kantona i federacije.

Učesnika u raspravi više nije bilo te je nakon provedenog postupka glasanja konstatovano da je Odluka o usvajanju Regulacionog plana „Uže urbano područje grada Breza“ usvojena jednoglasno sa 20 glasova ZA.

Ad 2.

Razmatranje i usvajanje prijedloga Odluke o provođenju Regulacionog plana „Uže urbano područje grada Breza“.

Bez učesnika u raspravi usvojena je Odluka o provođenju Regulacionog plana „Uže urbano područje grada Breza“ jednoglasno sa 20 glasova ZA.

Ad.3

Razmatranje i usvajanje prijedloga Odluke o pristupanju izradi Zoning plana „Poslovna zona Šaš“.

Također bez učesnika u raspravi jednoglasno sa 20 glasova ZA usvojena je Odluka o pristupanju izradi Zoning plana „Poslovna zona Šaš“.

Usljedila je pauza od 18:00-18:30h

Ad.4

Razmatranje i usvajanje Rješenja o utvrđivanju prava vlasništva na gradskom građevinskom zemljištu u korist Duranović Fuad.

Učesnika u raspravi po predloženoj tački dnevnog reda nije bilo pa je nakon provedenog postupka glasanja konstatovano da je Rješenje o utvrđivanju prava vlasništva na gradskom građevinskom zemljištu u korist Duranović Fuad usvojeno jednoglasno sa 20 glasova ZA.

5
Ad.5

Razmatranje i usvajanje Rješenja o utvrđivanju prava vlasništva na gradskom građevinskom zemljištu u korist Kruezi Jasmin.

Vijećnik Sokić Dževahid ukazao je na tehničku grešku u sva tri prijedloga rješenja te predlaže da se u istim napiše puno ime i prezime vještaka građevinske struke.

Nakon toga Rješenje o utvrđivanju prava vlasništva na gradskom građevinskom zemljištu u korist Kruezi Jasmina sa datom primjedbom jednoglasno je usvojeno sa 20 glasova ZA.

Ad.6

Razmatranje i usvajanje Rješenja o utvrđivanju prava vlasništva na gradskom građevinskom zemljištu u korist Omerhodžić Almedin.

Bez učesnika u raspravi jednoglasno sa 20 glasova ZA usvojeno je Rješenje o utvrđivanju prava vlasništva na gradskom građevinskom zemljištu u korist Omerhodžić Almedin.

Ad.7

Razmatranje informacije o provedenim aktivnosti u vezi sa rješavanjem aktuelne problematike FK Rudar Breza i pregled planiranih aktivnosti s ciljem konačnog rješavanja problema FK Rudar Breza u 2018/2019 godini.

Vijećnica Cigura Amina postavlja pitanje da li će prikazani iznos u rekapitulaciji od oko 57.000 KM, na dan 31.10.2018. godine koji treba da se uplati, biti preduslov za deblokadu računa.

Općinski načelnik pojasnio je da je planom aktivnosti u narednom periodu detaljno prikazan način prevazilaženja postojećih stanja i deblokadi računa FK Rudar.

Ad 8.

Razmatranje informacije o gospodarenju u šumi i šumskom zemljištu na području Općine Breza u PJ Šumarija Vareš za 2017. godinu.

Učesnika u raspravi po predloženoj tački nije bilo te je ista primljena k znanju.

Ad 9.

Razmatranje informacije o stanju poljoprivrede na području Općine Breza i Izvještaj o realizaciji Programa poticajnih mjera za 2018. godinu.

Pomoćnik Općinskog načelnika Salih Hasanspahić istakao je da je u poljoprivrednoj proizvodnji došlo do pada proizvodnje u svim granama poljoprivrede a posebno u malinarskoj proizvodnji te da je u odnosu na prethodne godine smanjenja proizvodnja za 60% nasada malina i jagoda. To pokazuje i 15.000 KM neutrošenih sredstava koje treba usmjeriti na druge vidove proizvodnje a predlaže da to bude proizvodnja mlijeka uz propisane kriterije iz 2017.godine. Kako bi se zaustavio trend smanjenja proizvodnje malina i jagoda predlaže dodatna ulaganja, kako bi stimulisali proizvođače u proizvodnji.

Općinski načelnik Zaimović Munib u svom izlaganju istakao je da je dolaskom na funkciju zatekao velika dugovanja za poljoprivredni poticaj te da su u proteklom periodu dugovanja gotovo izmirena.

Vijećnik Bajrić Fetah se ne slaže sa navodima Općinskog načelnika o isplati poljoprivrednih poticaja te mu nije jasno kako dolazi do isplate poticaja za 2018. godinu a da nije završena isplata poticaja za prethodne godine, kao i zbog čega nije dobio odgovor na vijećničko pitanje o isplati poljoprivrednog poticaja. Traži da se pripremi informacija o isplati

poljoprivrednog poticaja poimenično, iznos, godina i vrijeme isplate. Bajrić Fetah je naglasio da izvještaj i brojke sve govore te se vidi da je proizvodnja smanjena. Naglašava i da proizvođači nemaju sagovornika u Općini te da Općina vodi „nakaradnu“ politiku kao i da Općina treba promijeniti svoj odnos prema poljoprivrednim proizvođačima.

Predsjedavajući Općinskog vijeća Jusić Vedad je predložio da se donese zaključak kojim će se utvrditi raspodjela preostalih novčanih sredstava te da se pripremi izvještaj o isplati preostalog dugovanja za poljoprivredni poticaj.

Vijećnik Avdić Edin podržava prijedlog vijećnika Bajrić Fetaha u transparentnosti isplate poljoprivrednog poticaja. Predlaže i da se više pažnje posveti povlačenju sredstava iz fondova EU apliciranjem sa malim projektima koje će predložiti nadležna služba Općine.

Vijećnik Kadrić Memsud istakao je da se primjeti nedostatak Strategije razvoja Općine Breza kojom bi se definisao način i postupak razvoja poljoprivrede na području Općine Breza.

Pomoćnik Općinskog načelnika za finansije Beširević Meliha istakla je da je Strategija razvoja Općine Breza do 2029. godine u završnoj fazi te da će biti prezentirana vijećnicima na jednoj od narednih sjednica. Strategijom je definisana i Strategija razvoja poljoprivrede u narednom periodu. Također je istakla da je bilo dosta dugovanja u isplati poljoprivrednog poticaja iz prethodnih godina ali da je to svedeno na minimalan broj.

Vijećnik Bajrić Fetah predlaže da se napravi detaljna analiza kultura koje se siju i koje uspijevaju na području Općine Breza te da se izvrši analiza efekta poljoprivrednog poticaja kako bi mogli u narednom periodu donijeti odgovarajuće programe Općinskog poticaja za poljoprivredu.

Vijećnik Suljagić Mirzet se također uključio u raspravu te je predložio da se moramo bazirati na proizvodnju mlijeka i mliječnih proizvoda imajući u vidu činjenicu tradicije držanja i proizvodnje mlijeka i mliječnih proizvoda te da programe poticaja dopunjavamo i prilagođavamo stvarnim potrebama stanovnika naše Općine.

Vijećnik Ahmedspahić Mirza tražio je pojašnjenje o stvarnom stanju na terenu u odnosu na katastarsko stanje.

Pomoćnik Općinskog načelnika Hasanspahić Salih se također osvrnuo i na poticaje viših nivoa vlasti te da je potrebno uskladiti dodjelu poticajnih sredstava da ne bi došlo do zloupotrebe. Također je istakao da poljoprivredni poticaj viših nivoa vlasti naši proizvođači mogu teško ostvariti obzirom da smo mi Općina sa najusitnjenijim posjedima te da naši proizvođači ne mogu ispuniti propisane kriterije. Također je pojasnio svrhu i cilj poljoprivrednog poticaja te da isti nije socijalna kategorija.

Predsjedavajući Općinskog vijeća istakao je da će kolegij Općinskog vijeća na narednoj sjednici predložiti zaključak Općinskom vijeću o utrošku preostalih novčanih sredstava te isplati poljoprivrednog poticaja.

Nakon toga pristupilo se glasanju za informaciju o stanju poljoprivrede na području Općine Breza i Izvještaj o realizaciji Programa poticajnih mjera za 2018. godinu te je konstatovano da je ista usvojena sa 19 glasova ZA i jednim glasom PROTIV.

Ad 10.

Razmatranje informacije o provođenju zdravstvene zaštite stanovništva na području Općine Breza u 2018 godini.

Vijećnica Cigura Amina na zahtjev građana Općine Breza predlaže da se izvidi mogućnost zapošljavanja interniste i radiologa.

Vijeću se obratio i vijećnik Salčinović Fikret koji obavlja i funkciju direktora JU DOM ZDRAVLJA BREZA i istakao je da ova JU vrši usluge zdravstvene zaštite stanovnika shodno zakonskoj regulativi i po standardnim normama koje su propisane u provođenju zdravstvene zaštite. U svom izlaganju je istakao da Općina Breza prema broju stanovnika ne podliježe da 24h imamo hitnu medicinsku pomoć nego spadamo u kategoriju Općina koje imaju tzv. ljekare u pripravnosti te je napomenuo da Dom zdravlja Breza trenutno ima 6 timova porodične medicine dok je 7 tim u fazi formiranja. Također je istakao činjenicu da imamo negativan trend kao i da imamo više umrlih nego rođenih što je zabrinjavajuće i trebamo kao lokalna zajednica posvetiti više pažnje kako bi ovaj trend zaustavili.

Vijećnik Bajrić Fetah istakao je problem upućivanja velikog broja pacijenata za usluge zdravstvene zaštite u druge ustanove iz razloga što u Domu zdravlja ne mogu dobiti određene zdravstvene usluge. Također je naglasio na duge liste čekanja, a naročito interniste, te da treba riješiti na odgovarajući način.

Vijećnik Avdić Edin je istakao da je predloženi izvještaj pokazatelj činjenica koje oslikavaju stanje zdravstvene zaštite. Predlaže izradu Strategije razvoja zdravstva te se bazirati na nabavku neophodne savremenije opreme kao i adekvatan prostor kako bi poboljšali zdravstvenu uslugu. Ističe da je potrebno na prvo mjesto staviti zdravlje običnih ljudi o kojima niko ne vodi računa te je naveo praksu u BiH zdravstvu da funkcioneri i članovi njihovih porodica na liječenje odlaze u najopremljenije kliničke centre o trošku budžetskih sredstava a obični građanin nije u prilici da se liječi na adekvatan način.

Predsjedavajući Općinskog vijeća je na prijedlog vijećnika Sirotanović Arifa prije zaključenja sjednice općinskog vijeća izrazio žaljenje zbog nemilog događaja koji se desio gdje su život izgubila dva mlada policajca vršeći časno svoj posao, nedoknadiv je gubitak porodicama kao i kolektivu PS Sarajevo te se daje puna podrška kako porodicama poginulih tako i kolektivu PU Sarajevo.

Ovim je iscrpljen dnevni red dvadesetdruge redovne sjednice Općinskog vijeća Breza, koja je sa radom završila u 19:40 sati.

Sastavni dio ovog zapisnika čini i tonski zapis sjednice.

ZAPISNIK SAČINILA
Zakira Smailbegović

PREDSJEDAVALA
Općinskog vijeća
Jusić Vedad